

Jahresbericht vom Tanze 2012

Ou 2012 het mitem Tanzleiterträffe agfange. Am 6. Januar si z Vreni u Brigitte ga neuui Tänz lehre.

Äs ganz äs guets Wuchenänd hei mir am 28igste ufe 29igste Januar im Gwatt dörfe verbringe. Dert hei mir Tanzfroue das Jahr zerscht mau ou übernachtet. U so hei mir eis so richtig Zyt für ä Anang gha. Hei tou Zäme brichtet us natürlech ou luschtig zäme gah. Am Samstag isch ä Grichische Abe ufem Programm stange. Liliana het sogar mit de griechische Gest tanzet u das het natürlech viu zliche gä. U zum Abschluss vom Abe het natürlech ä guete Drink ou nit dörfe fähle sodass mir du nahr ganz guet het chönne schlafe! Am nächste Morge hei mir du ume vouer Elan tanzet u gsunge sodass mir wieder sehr viu hei chönne lehre. A das Wuchenänd tüe mit üs immer wieder mit viu Freud zrugge erinnere.

O i diesem Jahr hei während drüne Mau äs paari vor Tanzgruppe am „Tanze Mitenang“ teilgno. Dä Anlass isch vor Tanzleitig Mittuland düregführt worde.

Am 16. März si Kathrin u Silvia nach Detlingen a d'DV vor Trachtevereinigung Landesteil Mittelland, für di nöschte Informatione z'vernäh. Dert hei mit unger angerm vernoh, dass dr Jahresbitrag vo 3.- sFr. uf 6.- sFr. erhöht wird. Wie überau, het ou Trachtevereinigung chli mitem Gäud zkäpfe. Düregführt het dä Alass Trachtegruppe Frieswil.

Am 30. März het Trachtegruppe Zimmerwald zum Regionauträffe iglade. Ou i däm Jahr isch wieder viu gsunge u tanzet worde.

Für einisch het Silvia ä kurze Wäg gha für ads Bott, de das Jahr isches z Schwarzenburg ir Pösche düregführt worde. Si het doch du gmeint si chönni z Fuss gha, leider hets du a däm Tag so fescht gschneit, dass ou si het müesse z'Auto näh. Mit ihre hei no fuf angeri gurzeler Tanzfroue teilgno. Di Versammlig vom 22. April isch so lang lange, dassme am Schluss du gar nüm Zyt het gha für no eis z'tanze. Drum hei mir üs du beschlosse z'Kaffi bir Silvia znäh.

Zum 50-jährige Jubiläum vom festliche Tanzabe dr Bärner Trachtevereinigung hei säch am 19. Mai gut 450 tanzfreudigi Trachtelüt im Casino z Bärn troffe. Uf dr Tanzfläche isch ifrig z Tanzbei gschwunge worde. Begleitet het üs da drzue Ländlerkapäue Ulmizberg. Bis kurz nach de eine isch dert ganz viu tanzet worde,

Z'Tanzleiterträffe z Gümmligen isch das Jahr am 28. Oktober düregführt worde. Ah däm Träffe erfahre Tanzlüt immer wases für neuui Tänz git. Aber ou auti Tänz wärde ufgrüschet.

Mir Tanzfroue wete dir Vreni u dir Brigitta ganz, ganz härzlech Merci säge für di enormi Gedud wo dir geng für üs ufbringet. Mir freuie üs geng wieder ufe Mäntig für ids Tanze törffe zcho. Mir si stouz so kompetänti Tanzleiterinne dörfe z ha. Merci euich zwöine ganz härzlech!